

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होरें आखेआ ऐ जे स्वतंत्रता दिवस पर हर घर तिरंगा अभियान इक अनोखा उत्सव बनी गेदा ऐ। प्रधानमंत्री होरें अपने मन की बात कार्यक्रम च जम्मू कश्मीर दे कानी शॉल दा जिक्र कीता। उनें भारत गी नशीले पदार्थें शा मुक्त बनाने दी गुजारश कीती।
- प्रशासनिक काउंसल नै दिसम्बर 2025 तगर सब्बने सरकारी इमारतें गी सौर ऊर्जा कन्नै जोड़ने दे प्रस्ताह गी मंजूरी देई दित्ती ऐ।
- प्रधानमंत्री नरेन्द्र मोदी होरें बीपेजी दी हकूमत आले राज्यें दे मुखमंत्रिणं ते उपमुखमंत्रिणं कन्नै बैठक लाइवै केन्द्र सरकार दिणं योजनाएं दा दायरा बधाने सरबंधी गैही पर चर्चा कीती।
- श्री अमरनाथ जी दी यात्रा दरान अजें तोड़ी 4 लक्ख 58 ज्हार शा मते श्रद्धालुएं बाबा बर्फानी हुंदे दरबार च मत्था टेकी दित्ता ऐ। इस बरे दे श्रद्धालुएं दे आंकड़े नै पिछले बरे दा रिकार्ड गी त्रोड़ी दित्ता ऐ।

<><><><><><>

PM-MKB

प्रधानमंत्री नरेन्द्र मोदी होरें रेडियो पर कल प्रसारत मन की बात कार्यक्रम च जम्मू कश्मीर दे कानी शॉल दी गल्ल कीती। उनें गलाया जे 7 अगस्त गी मुख्य भरै च राष्ट्रीय हत्थखड्डी सरबंधी दिवस मनाया जाग। अज्ज कल लोकें च इनें उत्पादें प्रति खास रूझान बधेआ ऐ। केई सारियां निजी कंपनियां बी आर्टिफिशल इंटैलीजेंस राण हत्थखड्डी आले उत्पादें गी बढ़ावा देआ'रदियां न। अपने संबोधन च उनें हर घर तिरंगा अभियान दा बी जिक्र कीता। उनें आखेआ जे हर घर तिरंगा अभियान मुख्य च हर कुसै दा पसंदिदा अभियान बनेआ। सोशल मीडिया पर तिरंगे कन्नै फाटू पाने लेई लोकें च खास जोश ते उत्साह दिक्खेआ गेआ ऐ। उनें गलाया जे हर घर तिरंगा अभियान करी घर-घर ते कालोनी च तिरंगा दिक्खेआ जा'रदा ऐ। उनें लोकें गी अपील कीती जे ओह तिरंगे कन्नै अपनी सैल्फी गी harghartiranga.com पर अपलोड करन।

प्रधानमंत्री होरें नशीले पद्धार्थे दी कबैतु बारे बी गल्ल कीती ते लोकें गी अपील कीती जे ओह मुख्य गी नशा मुक्त बनाने लेई किट्टे रलियै कम्म करन।

<><><><><><><>

Parliament

संसद दे दोनें सदनें च केन्द्री बजट 2024–25 पर चर्चा अज्ज फही शुरू होग। केन्द्री वित्त मंत्री निर्मला सीतारमण होरें इस म्हीने दी 23 तरीक गी बजट पेश कीता हा। बजट पर सत्ताधारी ते बरोधी घड़ें दे मेंबरें अपनियां बक्ख–बक्ख प्रतिक्रियां दित्तियां न।

<><><><><><><>

AC-Decisions

उपराज्यपाल मनोज सिन्हा हुंदी प्रधानता तैहत कल लग्गी दी प्रशासनिक काउंसल दी बैठक च जम्मू कश्मीर च सब्बनें सरकारी इमारतें गी सौर ऊर्जा कन्नै लैस बनाने गी मंजूरी देई दित्ती गई। एहदे तैहत इनें सरकारी इमारतें दिएं छत्तें पर ग्रिड कन्नै जुड़े दे सौर ऊर्जा प्लांट स्थापत कीते जांगन। इस पूरी परियोजना दी लागत 4 सौ करोड़ रपे दी होग ते इस परियोजना गी जम्मू कश्मीर ऊर्जा विकास अजेंसी–जेकेईडीए पास्सेआ लागू कीता जाग। सरकारी इमारतें दिएं छत्तें पर इस परियोजना तैहत बक्ख–बक्ख समर्थ आले सौर ऊर्जा प्रोजेक्ट स्थापत कीते जांगन तां जे सरकारी इदारे दिएं खाली पेदिएं छत्तें दा इस्तेमाल सौर ऊर्जा पैदा करने लेई कीता जाई सकै। मेद ऐ जे इस प्रोजेक्ट गी दिसम्बर 2025 तगर सबूरा कीता जाग ते पैहले 5एं बरें दरान एहदे रक्ख–रखाव दी सुविधा जेकेईडीए आस्सेआ मुफ्त उपलब्ध करोआई जाग।

<><><><><><><>

AC-Leh & Kargil

उपराज्यपाल मनोज सिन्हा हुंदी अगुवाई आली प्रशासनिक काउंसल नै लेह ते कारगिल दे सरकारी आईटीआई ते पालिटेक्निक कालेजें दी वाबस्तगी गी जम्मू कश्मीर दे तकनीकी शिक्षा सरबंधी बोर्ड कन्नै जारी रक्खने दे प्रस्ताह गी मंजूरी देई दित्ती ऐ। लद्दाख केन्द्र शसत प्रदेश दी गुजारश पर मकामी विद्यार्थिं दे हितें गी दिक्खदे होई एह फैसला लैता गेआ ऐ। लद्दाख कश तकनीकी शिक्षा दा अपना कोई बोर्ड नेई ऐ ते जंदे बरे जून म्हीने प्रशासनिक काउंसल नै उत्थुं दे आईटीआई ते पॉलिटेक्निक कालेजें दी वाबस्तगी गी शैक्षणित सत्र 2024–25 तगर जम्मू कश्मीर दे तकनीकी शिक्षा बोर्ड कन्नै जारी रक्खने गी मंजूरी दित्ती गई ऐ।

हुन इस नमें फ़ैसले कन्नै एह बवस्था 2025–26 शैक्षणिक सत्र दे खीरै तोड़ी जां लद्दाख दा अपना कोई बंदोबस्त नेई करी लैने तोड़ी जारी रखने दी खुल्ल दित्ती गई ऐ।

<><><><><><>

Sowing Process

राई-बाई सरबंधी विभाग दे निदेशक अरविंदर सिंह रीन होरें चिन्नोर च बीएं दी पैदावार सरबंधी फार्म दा दौरा लाया ते लैब लाने आली प्रक्रिया गी बी दिक्खेआ। निदेशक होरें चला'रदी कम्में कारवाइएं खास करी लैब लाने आली मशीनें गी बी दिक्खेआ। एह भलेआं अज्जै कल्लै दी तकनीकें आली मशीन ऐ ते इस मशीन कन्नै लैब लाने लेई लोकें दी मजदूरें पर निर्भरता बी घट्ट होग। जम्मू कश्मीर च इस चाल्ली दी मशीन अपनी किस्मा दी पैहली-पैहली ऐ। एहदे कन्नै करसानें गी सौरत होग ते होर दुए लाह बी उनेंगी थ्होंगन।

<><><><><><>

Niti-Ramban

नीति आयोग आस्सेआ रामबन जिले दे खड़ी ब्लाक च त्रै म्हीनें दा सम्पूर्णता अभियान रंभेआ गेआ ऐ। इस कार्यक्रम दा मुख मकसद केन्द्र सरकार दिएं योजनाएं ते आप सहायता समूहें दे लाह लोकें तगर पजाना ऐ। इस बारे आकाशवाणी कन्नै गल्ल करदे होई जम्मू कश्मीर ग्रामीण आजीविका मिशन जेकेआरएलएम दे जिला प्रोग्रू मैनेजर जिबरान होरें आखेआ.....बाईट

<><><><><><>

PM-CMs

प्रधानमंत्री नरेन्द्र मोदी होरें केन्द्र सरकार दिएं योजनाएं दी पुज्ज हर कुसै तोड़ी पजाने लेई बीजेपी शासत राज्यें दे मुखमंत्रिं ते उपमुखमंत्रिं कन्नै चर्चा कीती। मोदी होरें सब्बनें गी अपने अपने राज्यें च शासन बवस्था गी होर बेहतर बनाने लेई केई सुझाह दित्ते ते कल्याणकारी योजनाएं दा लाह बेहतर ढंगा सिर लोकें तगर पजाने पर जोर दित्ता। कल नमीं दिल्ली च आयोजत बीजेपी मुखमंत्री परिषद दी दऊं रोजा बैठक गी संबोधत करदे होई आक्खी। बैठक दा मकसद बीजेपी शासत राज्यें दी कारकरदगी ते केन्द्र प्रायोजत स्कीमें दी समीक्षा करना हा। बैठका च बीजेपी प्रमुख जे.पी.नड्डा ते पार्टी दे वरिष्ठ नेता राजनाथ सिंह ते अमित शाह होर बी मजूद हे, मोदी होरें आखेआ जे केन्द्र प्रायोजित स्कीमां बड़ी एहतियात कन्नै तैआर कीतियां जंदियां न ते राज्य च इंदी अमलावरी दे तौर तरीके कन्नै छेड़छाड़ कोला बचेआ जाना लोड़चदा।

बैठक दे बाद पार्टी नेता विनय सहस्रबुद्धे होरें आखेआ जे मोदी होरें इनें योजनाएं दी असरदार अमलावरी ते सब्बने तोड़ी इंदा लाह जकीनी तौरा पर पजाने पर जोर दित्ता ।

<><><><><><>

Amarnath Yatra

श्री अमरनाथे दी यात्रा पूरी चाल्ली रमानदारी ते बवस्था आले ढंगै सिर जारी ऐ। तोआई जम्मू थमां अज्ज बडलै 1 ज्हार 832 श्रद्धालुएं गी लेइयै इक होर जत्था अज्ज बडलै सख्त सुरक्षा बंदोबस्तें हेठ कश्मीर घाटी लेई रवाना होआ। कुल 62 गड्डिएं दे काफले च रवाना इस जत्थे च 1 ज्हार 358 मर्द, 363 महिला, 2 न्याणे, 97 साधु ते 12 साध्वियां शामिल हियां, जेहड़े बडलै कोई साढे क त्रै बजे बम बम भोले दे जयकारे लांदे जम्मू दे भगवती नगर आले आधार शिविर “यात्री निवास” थमां रवाना होए। इंदे च 1 ज्हार 26 श्रद्धालु पहलगाम लेई ते 569 बालटाल लेई रवाना होए, जित्थुआं अग्गे ओह पवित्र गुफा लेई अपनी यात्रा शुरू करगंन।

<><><><><><>

Machail Yatra

28 ज्हार 973 श्रद्धालुएं पाड्डर, किशतवाड़ च श्री मचेल माता दरबार च मत्था टेकेआ। जम्मू दे किशतवाड़ जिले च मचेल पाड्डर च होने आली एह यात्रा पिछले किश दिनें दरान इक बड्डी आध्यात्मिक यात्रा दे तौर पर उभरियै सामने आई ऐ। धार्मिक मान्यताएं मूजब इस थाहरै पर मां चंडी आपूं साम-धाम वास करदियां न। श्री चंडी माता मंदरै करी पाड्डर दे मचेल ग्रां नै हाल दे समें च बड़ी मती लोकप्रियता हासल कीती ऐ। चंडी माता दी पवित्र छड़ी यात्रा ठाकुर कुलवीर सिंह हुंदे जददी ग्रां चिनोट भद्रवाह थमां श्रुय होंदी ऐ, जित्थुआं ढोल-नगाडें बजांदे होई वैदिक मंत्रोच्चार दे कन्नी इसी मचेल लेता जंदा ऐं हाल दे दिनें च एह यात्रा जम्मू थमां श्रुय होइ ऐ। इस बारे आकाशवाणी कन्नै खास गल्लबात करदे होई इक श्रद्धालु नै आखेआ....बाईट

<><><><><><>

Labour Commission

श्रम विभाग दे कमीशनर सरदार चरणजीत सिंह होरें ई-श्रम कन्नै जुड़े दे ओकड़े सब्बने लोकें जिंदे कश राशन कार्ड नेई ऐ जां जिनें राशन कार्ड च अपने नां नेई दर्ज करोआए दे न, गी गुजारश कीती ऐ जे ओह अगै औन ते तौले शा तौले अपना नां राशन कार्ड च दर्ज करोआन।

इनें लोकें गी आखेआ गेआ ऐ जे ओह् अपने नेड़े दे तैहसील सप्लाई दफतरै जां खुराक सिविल सप्लाईस ते उपभोक्ता मामले दे असिस्टेंट डरैक्टर हुंदे दफतर जां अपने सरबंघत जिले च असिस्टेंट लेबर कमीशनरे दे दफतर कन्ने राबता करन तां जे उंदे पक्ख च तौले शा तौले राशन कार्ड जारी कीते जाई सकन ।

<><><><><><>

Medical Camp

सेना आस्सेआ राजौरी जिले दी छात्रुनी थाहर लोकें दी जांच लेई इक कैंप लाया गेआ । कुल 88 लोकें गी मुफ्त मैडिकल जांच कीती गई ते उनेंगी दोआइयां बी दित्तियां गेइयां । इस दरान डाक्टरें ते मैडिकल नुमायंदे आस्सेआ लोकें दी जांच कीती गई । एहदा मकसद लोकें गी उंदे धरे दे कश सेहत सहूलत उपलब्ध करोआना ऐ । मकामी लोकें सेना दे इस जतन दा सराहा कीती ।

<><><><><><>

IMD

मौसम विभाग नै अगले 5 दिनें दरान जम्मू ते कश्मीर, लद्दाख, गिलगित, बाल्तिस्तान, मुजफ्फराबाद, पंजाब, हरियाणा, चंडीगढ़, दिल्ली, उत्तर प्रदेश ते पच्छिम राजस्थान च बरखा पौने दी पेशगोई कीती ऐ ।

<><><><><><>